

REGIONAL NEWS BULLETIN

HEADLINES (EVENING)

Date – 10/10/2024

Time - 18:30 -18:40Hrs

- NGO Coordination Committee chuan tuialhtheih man tihsan chungchang ennawn tura Cabinet thutkhawm hma chu –tuialhthei man tihsan chu tihtawp rih tur a ni ang tih Chief Minister in a hrilh an ti.
- Chief Minister Pu Lalduhoma kaihhruaiin chhiah thar siam lova chhiah lak khawm tihpun dan tur inrawnkhawmna neih a ni.
- School Education Department chuan zirna in hrang hrangah zirlai naupang te tan ‘Tui in Dar’ vawi 2 aia tlem lo vaw theuh turin thupek a chhuah.
- Prime Minister Narendra Modia chuan ni hnih cham turin vawiin khan Laos-a thleng.



PROTEST AGAINST FUEL PRICE HIKE

Mizorama NGO hrang hrang intelkhawmna NGO Coordination Committee chuan tuialhtheih man tihsan chungchang ennawn tura Cabinet thutkhawm hma chu – tuialhtheihman tihsan chu tihtawp rih tur a ni ang tih Chief Minister in a hrilh an ti.

NGOCC leh Mizoram Commercial Vehicle Union (MCVU) te hi vawiin khan Central YMA Committee Room ah an inkawm a, NGOCC Chairman Pu Lalhmachhuana, Central YMA President kaihhruaiah hian tunhnaia Sawrkarin Oil man a tihsan chungchang leh a kaihhnawih te, Mizoram Commercial Vehicle Union in karleh ni 14 atanga Oil man san leh kawng chhia avanga tlan loh an tum chungchang te sawiho a ni a.

Tunkar thawhlehnia Chief Minister an hmuh naah Chieg Minister chuan Oil man tih to chungchang hi Cabinet meeting thurel a nih avangin Cabinet meeting bawkin a ngaihtuah leh a ngaih thu leh Cabinet meeting koh thuai a nih tur thu a sawi a, chumi chung chuan hman rih loh- kept in abeyance a nih tur thu a lo hrilh niin NGOCC hruaitute chuan an sawi a. MCVU hruaitute chuan tunkar inrinni ral hma in Sawrkarin tawngka

ngeiin a hmalak tum dan hrilhfiyah se an ti tih an sawi a, hei bakah hian NGOCC hruaituten Sawrkar leh MCVU hruaitute inkawm dan tur ruahmanna lo siam se an ti.

Hetihlai hian Petrol leh Diesel man tihsan duh loh lantirna hi Aizawl City Bus Owners Assn chuan an thlawp thu an sawi a, karleh thawhtanni atanga Mizoram Commercial Vehicle Union in lungawilohna an lantir hunah an pawl huap chin city bus zawng zawng an ding ve dawn tih thuchhuah siamin an sawi a ni.

Mizoram Merchant Association (MIMA), General Hqrs. chuan NGO Co-ordination Committee leh Mizoram Commercial Vehicle Union (MCVU) ten Mizorama Oil man tih to chu ti hniam leh tura Sorkar an nawrna chu awm a tihpui a, an thlawp tih an sawi a, Mizoram hi India ram kilkhawr, Myanmar ram hrula awmin, tlang ram, kawng tha bawk si lova awm a ni a. Kan bungraw phurh man hi State dang aiin a sangsa tawh a. Tun anga oil man tih san a nih chuan bungraw phurh man a sang lo thei dawn lo a, Bungraw phurh man a san chuan bungraw man pawh a sang chhova, hei hi sumdawngte mai bakah, mipuiin an tuar dawn a ni, an ti.



WORLD MENTAL HEALTH DAY

Chief Minister Pu Lalduhoma'n midangte ngaidam theilo mihring an dam theilo a ti a, ngaidam theitu nih chu dam na ani tih a sawi.

He thu hi vawiina Aizawl Vanapa Hall-a World Mental Health Day puala hun a hmanpui naah sawiin Chief Minister chuan mihring chu ngaihtuahna kal dan ang zela lungchhiaa mittui tla mai thei leh hlim taka nui thei an ni tih sawiin dam khaw sei thu chu taksaah chauh ni lovin rilru lamah a innghat tel a ti a, zam mut theih loh chhan tam takte chu rilrua thil awm vang ani fo tih sawiin suangtuahna in mu thei lovah min siam a ti a, midangte ngaidam thei lo mihring hi an dam thei lo tih sawiin ngaihdam chu mihring damna a ni tih a sawi.

Health Minister Pi Lalrinpuii pawhin thusawiin, rilru hrisel nei turin thinlung lam ven that a pawimawh a ti a, midangte tanpuitu nih duhna rilru put chuan boruak nuam zawk a lo chhuak mai thin a ti bawk.

World Mental Health Day pual hian Poster siam leh Slogan phuah intihsiakna buatsaih a ni.

World Mental Health Day pual hian Mizoram hmun hrang hrangah hun hman a ni a, Excise and Narcotics Department leh Department of Clinical Psychology, Mizoram University thawk dun chuan World Mental Health Day pual hian Ch. Saprawnga building ah hun an hmang a,

Health & family Welfare Department hnuai National Mental Health Programme chuan High school leh Higher Secondary School level Essay Writing Competition buatsaih a ni a.

Kolasibah pawh World Mental Health Day hi District Mental Health Programme leh State Institute of Rural Development-te buaisaihin SIRD Conference Hall, Kolasib Vengtharah hun hman a ni a, he hunah hian Kolasib chhunga Department Office hrang hranga thawktute an kalkhawm a ni.

<><><>

RTI WEEK

Mizoram Chief Information Commissioner Pu John Neihlaia'n kum 2006 June ni 29 atanga kumin October ni 1 thleng khan RTI zawhna sing 3 chuang a lut tawh tih a sawi.

Akashvani palaiin a kawmna ah he thu hi sawiin CIC Pu John Neihlaia chuan kum 18 chhungin RTI zawhna lut zawng zawng hi 35,080 ani a ti a, Kum 2022 July thla atangin mobile phone leh computer hmanga zawh theihna RTI Online hawn thar niin, online hman atang hian zawhna a letin a lut tam zawk tih a sawi.

Pu John Neihlaia sawi danin RTI week pualin kuminah Mizoram hmun hrang hranga hun hman ani a, October ni 5 atanga ni 12 chhungin ramchhung hmun dang rualin hman a ni a, District tina Bawrhsap te kaihhruaiin a remchan danin RTI Week hman ani thin tih sawiin kuminah RTI Week hmang vek turin hriattirna pek a ni a ti a, RTI Week hmanna pui ber chu Aizawl ah naktuk zing dar 11 ah ATI Auditorium ah hman a ni dawn a ti bawk.

<><><>

CM

Chief Minister Pu Lalduhoma kaihhruaiin Centre for Environment & Social Justice hotute leh Taxation Department hotuten meeting an nei a. Chhiah thar siam chuang lova sawrkar sum leh pai dinhmun tha zawk a awm theih nana chhiah lak khawm tihpun dan tur inrawnkhawmna an nei.

He meetingah hian, state pawn atanga Mizorama sumdawng bungrua lo lut, GST pe si lo te dap chhuah leh fel fai zawka umzuidan tur te, Mizoram chhunga sumdawna kalpui, GST pe

ngei tura ngaih, pe si lo an tam ni a lang te, GST hi bungruaah chauh ni lova Services ah pawh lak tur a nih thu leh; services sector atanga chhiah pe lo an tam si nia a lan thu te bakah chhiah lama Mizoram hmasawna tur thil dangte an sawi a. Hma lak zui dan tur ruahmanna te pawh an duang a ni.

Meeting ah hian Pu TBC Lalvenchhunga, Adviser to CM leh official pawimawh te an tel a ni.



WATER BELL

School Education Department chuan zirna in hrang hranga zirlai naupangin an tui mamawh chanve tal zirna inah an in theihna turin ‘Tui in Dar’ (Water Bell) vawi 2 aia tlem lo vaw theuh turin thupek a chhuah.

School Education Department thuchhuah tarlan danin Education Minister Dr Vanlalhlana hova Department hotute thukhawm chuan zirlai naupangte hriselna atan “Tui In” chu chin thanah an neih theihna turin hmalak an rel a, hei vang hian School Education Department hnuai zirna in hrang hrang ten Tui In Dar vua in naupang zawng zawng ten tui an in thin tur ani tiin thu a chhuah a ni.

Department sawi danin tui mamawh zat chungchangah mithiamte rawn an ni a, Elementary school (Primary leh Middle School) naupangte chuan nitin tui litre 1 leh chanve an mamawh anga ngaih a ni a, High School leh Higher Secondary School naupangte chuan nitin tui litre 2 leh chanve vel an mamawha ngaih a ni bawk.

School Education Department Director Pu Lalsangliana chuan dar vuak hunbi chu zirna in tinah mahnia ruahmanna siam tur a ni a ti.



NGENGPUI BRIDGE

Lawngtlai-Diltlang-Parva kawnga metre -125 a sei Ngengpuilui Lei dawh chu vawiin khan Adviser to Chief Minister, Dr. Lorrain Lalpekliana Chinzah, Lawngtlai East bialtu MLA chuan a hawng.

Dr. Lorrain Lalpekliana chuan he Lei dawh a nih theih chhan ber sawrkar laipua Ministry of Defence leh Defence Minister, hmalakna a ni a ti a. He Lei dawh hna thawktu 71 RCC

Border Roads Organisation (BRO) Lawngtlai, hnathawh fakawm a tih thu sawiin MLA chuan Lawngtlai mipuite tana an hnathawh zawng zawngah lawmthu hrilhin, an hnathawh leh inpekna chu Lawngtlai mipuiten an theihngilh ngai dawn lo a ni, a ti.

MLA chuan Lei dawh hian Ngengpui khua leh Khawmawi tan inkal pawhna awlsam zawk a siam mai a ni lo a, sawrkar laipuiin a ngaih pawihmawh em em 'Act East Policy' a taka tihhlawhtlinna kawngah awmzia neiin, a tangkai dawn hle a ti. Mizoram sawrkarin 'Chamdur Project' a ngaipawimawh hle tih tarlangin MLA chuan he project hlawhlinna turin inkalpawhna tha tak a ngai a, leidawh tha tak avang hian Chamdur Project pawh chak zawka kalpui thuai a ni ang a, Lawngtlai West bial chu Mizoram ei leh bar a chawmtu ber a ni thei thuai dawn a ti.

Dr. Lorrain Lalpekliana Chinzah chuan fur ruahrui tlak nasat avangin kawngpuiin nasa takin a tuar a, hmun hrang hrangah leimin pawh a nasa hle a ti a. A bik takin buhfai phur motor lian ten Bungtlang South chauh an thleng thei tih sawiin, hei hian buhfai chungchangah harsatna lianzawk a thlen a hlauhawm hle a ti a. FCI godown - ah monsoon stock, buhfai a tlem tawh hle tih tarlangin, Bungtlang South piah khua hrang hrangten harsatna an tawh lohna turin 71 RCC Border Roads Organization - te chu tun thla chhung ngeia buhfai phur motor lian kal theih tura kawngpui siam tha turin a ngen a. 71 RCC BRO - ten an enkawl mek Lawnglai to Parva kawng (Km-160) a thui pawh a hma thei ang bera cheihnawm leh siam tha turin a ngen nghal baw.



PM IN LAOS

Prime Minister Narendra Modia chuan vawiin khan ni hnih cham turin Laos a thleng. Vientiane khawpuiah Laos Home Minister Vilayvong Bouddakham chuan a lo hmuak a ni.

PM Modia zin hian India leh ASEAN ramte inlaichinnaah nghawng tha tak a neih beisei a ni a. Vawiin khan ASEAN-India Summit vawi 21 naah a tel nghal a. Hemi rual hian ram hrauitu hrang hrangte a kawm dawn baw a. He bakah hian East Asia Summit vawi 19 na a hmang nghal dawn baw a ni.

A zinchhuah hmaa a thuchhuah siamah Pu Modia chuan India Act East Policy pawimawhna hrang hrang a tarlang a. ASEAN ram hruaitute nen an thawhchonain hma a sawn zel dan leh hun lo kal tura hmachhawp awmte an ngaihtuah ho tur thu a sawi a. Indo-pacific chhehvelah remna, muanna leh hausakna a awm theih nan harsatna awm thinte an sawiho ang a ti baw.



BOBEL PRIZE IN LITERATURE

Nobel Prize in Literature 2024 dawng turin South Korean thuziakmi Han Kang thlan a ni. Nobel Committee chuan vawiin khan he thu hi puangin Han Kang-i thuziak hian mihring nuna harsatna thleng leh mihring nun derthawnzia thiam takin a ziak a ni an ti.



RATAN TATA

Industrialist ropui leh hriathlawh nizana thi ta, Ratan Tata chuan ui tu leh thlahthu ramchhung hmun hrang hrang a nei a. President Droupadi Murmu, Vice President Jagdeep Dhankhar, Prime Minister Narendra Modi, leh mi langsar tak takten Pu Tata thi an ui thu an sawi a ni.

Vawiin khan Ratan Tata ruang hi Mumbai-a National Centre for Performing Arsts-ah dah niin amah ngaisangtu mi tamtakin thlahna hun an hmang a. He hunah hian Maharashtra Deputy Chief Minister Ajit Pawar, Minister of Industries Uday Samant, NCP (SP) hotupa Sharad Pawar, Chief Minister hlui Uddhav Thackeray, RBI Governor Shaktikant Das, leh industrialist Kumar Mangalam Birla te pawhin thlahna hun an hmang a ni.

A ruang hi tlai dar 4:30 thleng khan mipui tlawh theiha dah a ni a. Hemi hnu hian Worli crematorium ah vui a ni a. Pu Tata vuinaah hian Union Home Minister Amit Shah pawh a tel a ni.

Puan tawh angina Ratan Tata chu nizan khan kum 86 mi niin Mumbai ah a thi a. Pu Tata hi hun engemawchen private damdawiinah enkawl a nih hnuah a thi a. Maharastra sawrkar chuan Ratan Tata hi sawrkar chawimawina famkim nen vui liam anih tur thu a puang a ni.

